

Sofia Berther

29-01-1921 - 19-02-2007



(LB) Ils 19 da fevrer 2007 ei l'onda Sofia, sco ella vegneva numnada da nus en famiglia, sedurmentada en tutta tgeuadad en casa Sogn Vigeli e ha aschia terminau siu viadi sin quest mund ella biala vegliadetgna dad 86 onns.

La Sofia ei naschida ils 29 da schaner 1921 sissum Gionda sco sisavel dad otg affons da Vigeli e Mariuschla Berther-Schmid. En la sempla famiglia da purs ha ella passentau ina bial' affonza e sco ella raquintava meinsvart, veva ei gia giu num baul, semetter en e segidar culs da casa en nuegl, sil funs ed a casa. La tatta da Cavorgia ed in aug da vart dalla mumma vevan era priu dimora tier la famiglia sin Gionda, aschia che la truscha vegneva ad esser meinsvart ualti gronda ed ins saveva bein grau da mintga agid.

A scola ei la Sofia ida a Sedrun ed a Camischolas. Temps liber deva ei buca stedi, mo tonaton deva ei igl unviern mintgatun ina scursalada ni ch'ei vegneva schizun priu ils skis dils buobs per far ina ni l'autra cuorsa. Naturalmein ch'ei deva da lezs temps ni runals ni pistas, il gaudi vegneva denton ad esser silmeins aschi gronds sco quei ch'el ei oz.

Suenter haver frequentau las scolas ha ei giu num ir en piazza e fadigiar. Per mudestas pagas, magari in pèr calzers e zacons francs, ei la Sofia stada fumitgasa tier famiglias da purs. Pli tard eis ella ida giu la Bassa per far la casarina en famiglias ni per luvrar en la gastronomia. Savens raquintava ella da sia piazza tier dr. Derungs a Glion ni el buffet dalla staziun a Turtig. Ensemen cun sia sora Anna ha ella era fatg l'ustiera e menau entgins onns il restaurant Krüzli a Sedrun. Duront ils onns dalla construcziun dils mirs da fermada en nossa regiun entaupan ins la Sofia sco conlvrera e menadra da differentas cantinas da luvrers, seigi quei giul Drun ni lu a Sursaissa. Duront quei temps ha ella fatg enconuschientscha cun biars luvrers jasters ch'eran ella regiun da gliez temps. Cun numerus da quels ha la Sofia tgirau bien contact duront biars onns, cun singuls schizun tochen sia mort. Numerusas fotografias dattan perdetga da quei temps e dils contacts, la Sofia ei stada meinaspusa tier nozzas da pèrs talians en nossa val e ha era astgau far madretscha dad in ni l'auter affon da quellas famiglias.

Tgunsch ha ella era empriu il lungatg talian da gliez temps, il qual ella ha adina saviu duvrar pli tard.

Ilis onns sissonta ei la Sofia serendida el cantun Glaruna, nua che sia sora Maria viveva cun sia famiglia. La Sofia ha luvrau entgins onns en ina fabrica a Ziegelbrücke e schizun baghegiu casa a Niederurnen. Ilis nevs e las niazas astgavan ir mintgaton tier ella en vacanzas per zacons dis.

En Tujetsch eran il turismus e la buna conjuntura era sefatgs valer da lezs onns. La Sofia e sias duas soras Anna e Barla ein sedecididas da nezegiar quei bien temps da carschen economic e han baghegiu igl onn 1965 il hotel Mira. Cun nuot hagian ellas entschiet a far plans e la Sofia ha meinsvart raquintau, co ella stuevi contrahar cun las bancas per survegnir ils credits necessaris per quella gronda investiziun. Quei pass ha bein duvrav bia curascha. Sin Nadal 1965 han las treis soras aviert il hotel. La Sofia era la directura, l'Anna veva siu reginavel el servis, ella lingerie e sillas etaschas, la domena dalla Barla era la cuschina. Cun agid da personal da cuschina, servis, lingerie e combras han ellas manischau duront rodund 15 onns il hotel Mira. Il cudisch da hosps ei perdetga dil bien quitau che las treis soras vevan dils hosps. Ellas sedevan breigia, che tuts sesentien bein tier ellas, seigi quei ils indigens alla meisa rodonda, ils numerus trochists, ils luvrers jasters, mo lu secapescha era ils turists che prendevan dimora en lur hotel stad ed unviern. Cun biars da quels han las soras tgirau bien contact era suenter haver vendiu il hotel.

La Sofia ha adina giu bien contact cun ses confamiliars. Fargliuns, nevs e niazas eran adina beinvegni tier ella a casa. In puschegn ni ina marena surveva ella senza excepziun e tut tenor tgi che visitava ella, vegneva ei dau troccas. Dar troccas era il grond hobi dalla Sofia, tras il qual ella ha era tgirau biars buns contacts cun numerusas personas el vitg. La Sofia era adina da buna fei e schava ir sperasvi negin, senza scumiar in plaid.

Igl uost 2006 ha la Sofia stuiu serender el spital a Glion. Turnond a Sedrun ha ella priu dimora en casa Sogn Vigeli. Ella veva organisau quei pass gia avon che ir el spital, sco quei ch'ella ei stada disada l'entira veta dad esser responsabla per sesezza. Schizun la sligiazion da sia habitaziun haveva ella organisau e dau sura la responsabladad persunter a duas da sias figliolas. La Sofia ha mai vuliu schar sura zatgei a zatgi, che vess forsà giu malaveta pervia dad ella. En casa Sogn Vigeli ha la Sofia gudiu la buna cumpignia dils cussadents, la tgira dil personal e las visetas da parents ed enonuschents. Naven dil december 2006 ha ella pusinau adina pli fetg, vegliadetgna e malsogna han priu ad ella las forzas. Aschia ha ella bandunau quest mund la damaun dils 19 da fevrer 2007. Nus vegnin a tener la Sofia en buna memoria. Ella ruaussi en pasch.